

JPWPL Jalin Hubungan Dua Hala dengan Negara Jepun



Labuan, 29 Julai – Jabatan Pendidikan Wilayah Persekutuan Labuan telah berjaya mewujudkan hubungan dua hala profesional dalam bidang pendidikan dan pembangunan bola sepak dengan negara Jepun.

Jabatan ini telah dikunjungi oleh oleh Mr Tatsuya Tony Takahashi, *Director* NPO SAM (Save the Asian Monuments), Mr Kojima Takuya, *Senior Coach of Tokyo Football Association*, Miss Iyama Tomomi, *Nursing, medical science and student care teacher, Board member of NPO SAM* dan Mr Daichi Baba, pada 25 Julai hingga 28 Julai 2019.

Rombongan telah melawat beberapa sekolah, antaranya ialah SK Sungai Badaun, SMK Taman Perumahan Badaun dan SMK Mutiara.

Pihak sekolah telah membuat sesi perkongsian mengenai Komuniti Pembelajaran Profesional (PLC) dan *Science, Technology, Engineering and Mathematics (STEM)*, di samping aktiviti-aktiviti pembelajaran dan pengajaran di

dalam kelas.



Rombongan NPO SAM, Jepun, Pegawai-pegawai JPNS, pegawai-pegawai JPWPL bergambar kenangan bersama murid-murid SK Sungai Bedaun.

Di SMK Mutiara dan SMK Taman Perumahan Bedaun, Mrs Iyama Tomomi dan Mr Daichi Baba telah berkongsi kepada para guru berkenaan pendidikan dalam penjagaan kesihatan di sekolah-sekolah Jepun.



Dari kiri Dr Hyginus, Mrs Sally Ann Scott, Encik Mohd Nizam, Mrs Iyama Tomomi dan Mr Daichi dalam perkongsian

pendidikan mengenai penjagaan kesihatan di sekolah-sekolah Jepun

Sempena lawatan tersebut juga, satu pertandingan Karnival Mini Liga Bola Sepak antara sekolah-sekolah Menengah di Labuan telah diadakan di Padang Bola Sepak SMK Pantai dan SK Pantai.

Mr Kojima Takuya telah mengambil bahagian sepenuhnya dalam karnival itu dengan memberi dorongan dan sokongan kepada sekolah-sekolah yang bertanding.

Beliau turut memuji kemahiran individu yang dimiliki oleh pemain-pemain sekolah di Labuan tetapi masih banyak ruang untuk diperbaiki terutama dalam permainan berpasukan.

Mr Kojima juga telah berkongsi kepakaran dan pengalaman kepada jurulatih-jurulatih setiap sekolah dalam memperbaiki kelemahan pasukan dan pihaknya bersedia untuk membantu mengembangkan lagi teknik kejurulatihan dan kemahiran para pemain.

Beliau akan membawa para pemain remaja bola sepak di Jepun untuk membuat kolaborasi dan perlawanan persahabatan bagi meningkatkan lagi pembangunan bola sepak di wilayah ini.



Mr Kojima dan Puan Norazita bersama pemain bola sepak SMK Pantai

Terdahulu, Mr Kojima dan Mr Daichi sempat menyertai pasukan Jabatan Pendidikan Wilayah Persekutuan Labuan dalam perlawanan persahabatan menentang Pasukan Angkatan Tentera Malaysia (ATM), Labuan.



Para Pemain JPWPL dan ATM Labuan



Dari kiri Mr Tony, Mr Daichi, Mr Kojima, Encik Raisin Saidin dan para pemain JPWPL

Pengarah Jabatan Pendidikan Wilayah Persekutuan Labuan, Encik Raisin Saidin ketika ditemui dalam perbincangan antara kedua-dua pihak, mengucapkan terima kasih dan menzahirkan rasa gembira dengan kehadiran para rombongan dari Jepun yang hadir.

Beliau berharap jalinan kerjasama ini dapat mewujudkan

hubungan dua hala profesional dalam bidang pendidikan dan pembangunan sepak bola untuk pengembangan profesional guru dan murid antara Labuan dan Jepun.

Perancangan seterusnya dengan membawa pelajar-pelajar daripada Universiti Toyo, Jepun untuk datang berkunjung ke Labuan pada tahun 2020.



Ketika sesi lawatan ke SMK Taman Perumahan Bedaun

Jalinan Pintar JPWPL dan KUPU, Brunei Darussalam



Labuan, 23 Julai – Jalinan kerjasama pintar yang telah terjalin bermula Januari 2019 yang lalu menjadi wadah kepada kerjasama berterusan antara Jabatan Pendidikan Wilayah Persekutuan Labuan (JPWPL) dengan Kolej Universiti Perguruan Ugama (KUPU) Bandar Seri Begawan, Brunei Darussalam.

Lawatan kerja perkongsian komuniti pembelajaran professional dalam inovasi pengajaran dan pembelajaran (PdP) para pensyarah dan pelajar KUPU bermula 22hb sehingga 25hb Julai merupakan peluang yang sangat berharga kepada warga pendidik di Wilayah Persekutuan Labuan.

Rombongan seramai 17 orang ini diketuai oleh Pensyarah KUPU, Ustaz Dr Zulkifli bin Haji Zakaria.

Dalam beberapa siri lawatan ke sekolah, Pengarah Jabatan Pendidikan Wilayah Persekutuan Labuan, Encik Raisin Saidin telah diwakili oleh Puan Khaziyati Osman, Ketua Sektor Jaminan Kualiti, merangkap Pengurus Program.

Antara sekolah yang dilawati oleh KUPU ialah SK Sungai Bedaun, SK Bebuloh, SK Pantai, SK Tanjung Aru, SMK Taman Perumahan Bedaun. Sekolah-sekolah ini merupakan sekolah

yang terlibat dengan Program Transformasi Sekolah 2025 (TS25).



Para Pelajar dan guru didedahkan dengan bahan inovasi yang dihasilkan oleh pensyarah dan pelajar KUPU



Lawatan Perkongsian Inovasi PdP KUPU ke SK Bebuloh Rombongan juga turut melawat Sekolah Menengah Agama, Majlis Agama Islam Wilayah Persekutuan Labuan (SMA MAIWP Labuan) dan membuat sesi perkongsian bersama guru Pendidikan Islam di Wilayah ini.

Pengarah Jabatan Pendidikan Wilayah Persektuan Labuan,

Encik Raisin Saidin mengalu-alukan semua ahli rombongan ke pulau yang indah ini untuk lawatan kerja perkongsian pembelajaran melalui inovasi dan kreativiti pedagogi yang boleh memberikan kepelbagaian bentuk alat inovasi yang boleh membantu guru-guru di Wilayah Persekutuan Labuan.

Inovasi merupakan tindak kerja untuk membina satu perkara atau hasil yang baharu atau membuat satu pembaharuan. Dalam hal ini, sebarang inovasi yang dihasilkan dapat menyemarakkan idea kreatif dalam pengajaran dan pembelajaran di bilik darjah bagi guru serta pengurusan berkesan kepada pemimpin dan pengurus di jabatan dan sekolah.

“Sehubungan dengan kehadiran rakan-rakan pendidik daripada negara Brunei Darussalam, bukan hanya dapat berkongsi kemahiran berinovasi dan berkreativiti dalam pendidikan, malah dapat mengukuhkan silaturrahim yang telah sedia terjalin”. Encik Raisin Saidin



Encik Raisin Sadin tertarik mendengar penerangan mengenai Inovasi KUPU oleh Ustaz Haji Roslan Ketua Sektor Jaminan Kualiti, Puan Khaziyati binti Osman berkata perkongsian ini akan memberi peluang kepada sekolah dan guru-guru Pendidikan Islam untuk menimba ilmu inovasi PdP yang pastinya boleh menambah kemahiran guru sedia ada.

Sementara itu, Ustaz Dr Zulkifli bin Haji Zakaria selaku ketua rombongan mengucapkan ribuan terima kasih kepada pihak Jabatan Pendidikan Wilayah Persekutuan Labuan di atas sambutan dan layanan yang cukup istimewa kepada ahli rombongan.

Besarliah harapan beliau agar lawatan kerja pendidikan ini dapat mengukuhkan lagi jalinan pendidikan antara Malaysia dan Brunei Darusalam serta diberkati dengan silaturrahim berterusan.



Puan Khaziyati (4 dari kiri) dan Ustaz Dr Zulkifli bersama Ketua-Ketua Sektor, Pegawai JPWPL dan Para Pensyarah serta pelajar-pelajar KUPU ketika lawatan ke Jabatan Pendidikan WP Labuan

Sekitar Perkongsian Pintar inovasi KUPU bersama guru-guru Pendidikan Islam di Wilayah Persekutuan Labuan







Sekitar Perkongsian Pintar inovasi KUPU bersama guru-guru dan murid-murid SK Sungai Bedaun





Perhimpunan Bulanan JPWPL, Julai 2019 : Data Kita Tanggungjawab Kita



Labuan, 18 Julai – Jabatan Pendidikan Wilayah Persekutuan Labuan (JPWPL) telah melancarkan Sambutan Bulan HRMIS Peringkat Negeri yang telah dirasmikan oleh Pengarah Pendidikan, Encik Raisin Saidin pada Perhimpunan Bulanan JPWPL bertempat di BTPN Labuan, kelmarin.

Bulan Julai telah dijadikan Bulan HRMIS peringkat kebangsaan bagi mempromosi HRMIS, berkongsi maklumat serta permasalahan, meningkatkan ketepatan data HRMIS dan memperluaskan penggunaan *Business Intelligence (BI)* dalam analisis data HRMIS.

Encik Raisin Saidin berkata semua pemilik kompetensi (Competency Owner/ CO) perlu memastikan data masing-masing dalam HRMIS sentiasa dikemaskini, tepat dan

berintegriti.

Ketepatan dan kesahihan data dalam HRMIS adalah tanggungjawab masing-masing. Saya menyeru semua warga Jabatan Pendidikan Wilayah Persekutuan Labuan untuk bertanggungjawab dengan data yang terdapat dalam HRMIS seperti tagline Kementerian Pendidikan Malaysia iaitu Data Kita, Tanggungjawab Kita. Encik Raisin Saidin

Beliau juga menzahirkan kegembiraan dan tahniah di atas kejayaan Jabatan Pendidikan Wilayah Persekutuan Labuan dengan meraih 5 bintang Anugerah Kecemerlangan Petunjuk Prestasi Utama (KPI) HRMIS bagi tahun 2018.



Anugerah 5 Bintang HRMIS 2018 disampaikan kepada Pegawai Meja Puan Ajiejah

Dalam masa yang sama, Encik Raisin Saidin mengingatkan semua warga pendidikan, masih ada ruang penambahbaikan dalam HRMIS terutama memastikan data adalah sahih dan terkini.

Di majlis yang sama telah diadakan taklimat Pusat Pungutan Zakat (PPZ) Labuan, penyampaian sijil kepada sekolah, surat kenaikan pangkat, sijil dan cenderamata, *staff of the month* dan sambutan Hari Lahir bagi bulan Julai 2019.

Cikgu Roziah Abdul Rahman, guru SM St Anthony telah diangkat sebagai Adiwira Guru Labuan bagi bulan Julai 2019.



Sambutan Hari Lahir Warga Pendidikan Labuan yang lahir pada bulan Julai



Encik Christopher menerima sijil kenaikan pangkat daripada Encik Raisin Saidin



Puan Khaziyati menyampaikan *goodies* Hari Lahir kepada Encik Raisin Saidin



Encik Azizi menerima sijil *Staff Of The Month* bagi bulan Julai 2019

**SPI Dedahkan Guru
Pendidikan Islam, PdP
Berasaskan Teknologi**



Labuan, 9 Julai – Sektor Pendidikan Islam, Jabatan Pendidikan Wilayah Persekutuan Labuan telah berjaya menganjurkan Bengkel Kerja Pemantapan Guru Pendidikan Islam dan Guru Bahasa Arab bertempat di Bahagian Teknologi Pendidikan Negeri, WP Labuan.

Bengkel yang berlangsung selama 2 hari ini bermula 8hb Julai, telah berjaya menarik minat 65 orang peserta yang terdiri daripada 20 orang peserta sekolah menengah dan 45 orang peserta dari sekolah kebangsaan.

Ustazah Norshifa Saad, SISC+ Barat Daya dari Negeri Pulau Pinang telah dijemput sebagai penceramah sepanjang bengkel berlangsung.



Penceramah: Ustazah Norshifa Saad. SISC+ Barat Daya, Pulau Pinang

Di dalam bengkel tersebut perkongsian amalan terbaik dalam menggunakan aplikasi terkini untuk menghasilkan pembelajaran dan pengajaran yang menarik minat murid seiring pelaksanaan Pembelajaran Abad ke 21 (PAK21) dan Revolusi Industri 4.0.

Antara aplikasi-aplikasi yang didedahkan seperti Google Classroom, Mentimeter, Google Keep, Zappar, Proprofs dan lain-lain lagi.

Rata-rata peserta seronok sepanjang bengkel tersebut diadakan dan memohon agar dilaksanakan bengkel lanjutan dan memilih mereka sebagai peserta kembali.



Ustaz Rahman sedang berbincang di dalam kumpulan mengenai teknologi *mobile apps*

Turut hadir di dalam bengkel tersebut, Ustazah Sitti Rahimah binti Yusuppu, Penolong Pengarah Unit Perancangan dan Pembangunan Islam, Sektor Pendidikan Islam.

Beliau selaku wakil sektor mengucapkan ribuan terima kasih kepada penceramah atas segala ilmu dan pengalaman yang dikongsikan dan terima kasih juga kepada peserta-peserta bengkel atas kerjasama yang diberikan.

Berita Oleh : Sektor Pendidikan Islam



Peserta Bengkel Sekolah Rendah

Perhimpunan Bulanan JPWPL, Jun 2019 : Contohi Teknik Rasulullah Mengajar



Labuan – Perhimpunan Bulanan Jabatan Pendidikan Wilayah Persekutuan Labuan (JPWPL) telah diadakan bertempat di Bahagian Teknologi Pendidikan Negeri pada 13 Jun lalu.

Berucap di majlis tersebut, Encik Raisin Saidin, Pengarah Jabatan Pendidikan Wilayah Persekutuan Labuan telah berkongsi ilmu mengenai buku bertajuk 40 Teknik Rasulullah Mengajar, karangan Sheikh Abdul Al Fatah.

Beliau berkata, mengambil beberapa contoh teknik Rasulullah mengajar, seorang guru perlu menjadi 'role model' kepada murid, mengajar secara beransur-ansur disertai dengan kesabaran dan istiqamah, meraikan kesederhanaan dan mengelakkan kebosanan, meraikan perbezaan pelajar, berdialog dan sesi soal jawab serta teknik kiasan, perumpamaan.

Turut diadakan penyampaian sijil anugerah kecemerlangan kepada pihak sekolah, *staff of the month*, meraikan kakitangan yang bersara dan sambutan hari lahir kepada

kakitangan jabatan serta sekolah yang lahir pada bulan Jun.

Majlis itu telah dihadiri oleh Ketua-ketua Sektor, para pegawai, Pengetua Guru Besar, guru-guru yang diraikan dan kakitangan Jabatan Pendidikan Wilayah Persekutuan Labuan.

Jabatan Pendidikan Wilayah Persekutuan Labuan menghargai dan mengucapkan syabas dan tahniah kepada Sekolah Antarabangsa Labuan, Sekolah Kluster Kecemerlangan SK St Anne dan Adiwira Guru Cikgu Angeline Leong dari Sekolah Kebangsaan Kerupang di atas pengiktirafan Sempena Sambutan Hari Guru Peringkat Kebangsaan 2019, baru-baru ini.

**Marvin Terima Anugerah Khas
Pengarah Pendidikan WP
Labuan**



Labuan – Adik Marvin Hing Majin dari Sekolah Menengah Kebangsaan Labuan telah dipilih sebagai penerima Anugerah Khas Pengarah, Jabatan Pendidikan Wilayah Persekutuan Labuan bagi bulan Mei 2019.

Adik Marvin dipilih di atas kejayaan mendapat Pingat Perak dalam acara Lompat Jauh Kejohanan Olahraga Majlis Sukan Sekolah-Sekolah Malaysia (MSSM) 2019 bagi Kategori Lelaki 18 Tahun dan pencapaian yang cemerlang dalam bidang akademik, mahupun kokurikulum.

Pengarah Jabatan Pendidikan Wilayah Persekutuan Labuan, Encik Raisin Saidin berkata Anugerah Khas Pengarah ini, buat julung kalinya diberikan kepada murid bagi mengangkat martabat murid dan memberi pengiktirafan di atas pencapaian membanggakan yang telah ditunjukkan.

Anak kepada pasangan Encik Majin Basayu dan Puan Teo Boon Leng ini dilahirkan di Kota Kinabalu, Sabah dan mempunyai 2 orang adik beradik.

Beliau mula berkecimpung dalam bidang olahraga khususnya

lompat jauh ketika berumur 12 tahun di Sekolah Kebangsaan St Anne dan minat beliau diteruskan lagi di peringkat sekolah menengah, SMK Labuan.

Cikgu Faizal Abu Bakar, Cikgu Hafiz, Cikgu Bedevonsoon merupakan antara individu penting sebagai jurulatih yang telah membantu adik Marvin dalam bidang olahraga dan lompat jauh.

Dalam bidang akademik, beliau telah berjaya meraih 9A dalam PT3 dan mendapat gred A dalam SEGAK serta gred A PAJSK.

Beliau juga aktif dalam bidang sukan lain seperti badminton dan mewakili sekolah Labuan dalam permainan Catur Kebangsaan pada tahun 2017 dan 2018.

Di bidang kokurikulum, adik Marvin dan rakan-rakan telah berjaya merangkul tempat pertama dalam pertandingan National Science Challenge 2018 peringkat negeri dan tempat pertama dalam Pertandingan Bahas Bahasa Inggeris Ala Parlimen peringkat negeri pada tahun 2016 dan 2017, seterusnya mewakili Labuan dalam peringkat Kebangsaan.

Harapan sebagai seorang atlit, adik Marvin berharap agar suatu hari nanti beliau dapat memenangi kejohanan SUKMA 2020 dan kejohanan di peringkat antarabangsa serta mengharumkan nama sekolah, amnya Wilayah Persekutuan Labuan.

Beliau yang akan menduduki peperiksaan Sijil Pelajaran Malaysia tahun ini akan membuat yang terbaik untuk mendapat keputusan yang cemerlang dan berharap berjaya melanjutkan pelajaran hingga ke menara gading.

Ditanya mengenai faktor kejayaan dalam acara lompat jauh MSSM 2019, beliau menjawab sokongan moral ibu bapa, rakan-rakan, inisiatif dan usaha para jurulatihnya yang melatih beliau bermula tahun 2015 sehingga hari ini.

Begitu juga dengan pihak sekolah yang mewujudkan tempat latihan bersesuaian dan menyediakan gelanggang lompat jauh yang membantu dalam meningkatkan kemahiran teknikal lompatan beliau.



Adik Marvin bersama Cikgu Faisal menunjukkan Pingat Perak yang dimenangi dalam Kejohanan Olahraga MSSM 2019

**Perhimpunan Bulanan, Mei
2019 : Guru, Obor Hemah**

Menyinari Pertiwi



Labuan – “Guru, Obor Hemah Menyinari Pertiwi”, tema Perhimpunan Bulanan Jabatan Pendidikan Wilayah Persekutuan Labuan (JPWPL) yang telah dipilih bagi bulan Mei 2019, selaras dengan tema sempena Hari Guru Kebangsaan 2019.

Majlis telah berlangsung pada 23 Mei lalu, bertempat di Bahagian Teknologi Pendidikan Negeri, WP Labuan, dihadiri oleh Ketua-ketua Sektor, Pegawai dan Kakitangan JPWPL serta para Pengetua Guru Besar.

Pengarah Jabatan Pendidikan Wilayah Persekutuan Labuan, Encik Raisin Saidin dalam ucapannya menggariskan ciri-ciri yang perlu ada pada seorang guru.

Antaranya guru perlu sentiasa hadir ke sekolah dan masuk ke bilik darjah tepat pada waktunya. Ini penting kerana ianya memberi contoh teladan kepada murid mahupun kepada guru rakan sejawat dan menjadi akauntabiliti seorang guru untuk masuk ke bilik darjah untuk melaksanakan tanggungjawabnya.

Guru juga perlu memberi perhatian penuh kepada murid-muridnya secara menyeluruh dan rasa kepedulian yang tinggi. Ianya bertepatan dengan nilai teras yang diintegrasikan dalam sistem pendidikan negara oleh Kementerian Pendidikan Malaysia melalui kasih sayang, kegembiraan dan sifat saling menghormati.

Adik Marvin Hing Majin telah dipilih menerima Anugerah Khas Pengarah di atas kejayaan merangkul pingat perak dalam acara lompat jauh dalam Kejohanan MSSM peringkat kebangsaan baru-baru ini serta pencapaian yang cemerlang dalam bidang akademik.



Adik Marvin Hing Majin bersama ibu bapanya menerima Anugerah Khas Pengarah Cikgu Anne dari Sekolah Kebangsaan Patau-Patau telah dipilih sebagai Adiwira Guru bagi bulan Mei 2019.

Pada majlis tersebut juga diadakan penyampaian sijil dan cenderamata kepada Encik Sahar Misron, mantan Pengetua SMK Pantai serta Puan Monica Liew Fook Jin, mantan Pembantu Operasi SK Sungai Bedaun yang telah bersara pada bulan Mei ini.

Baca [Jasamu Dikenang : Terima Kasih Cikgu Omar, Terima Kasih Cikgu Sahar](#)

Seramai empat orang Pengetua baharu yang telah dilantik iaitu Encik Mohd Nizam Yasim (SMK Mutiara), Encik Yahya Ahmad Puteh (SMK Ranche-Ranche), Puan Norazita Md Nor@Shamsuri (SMK Pantai IBWS) dan Puan Mary Anita Abah (SM St Anne).



Jasamu Dikenang : Encik Sahar Misron



Para Guru Besar sempat menggayakan suasana Hari Raya di perkarangan BTPN

Jasamu Dikenang : Terima Kasih Cikgu Omar, Terima Kasih Cikgu Sahar



Labuan : Majlis Pengetua Sekolah Malaysia (MPSM), Labuan telah mengadakan Majlis Jamuan bagi meraikan persaraan 2 orang Pengetua iaitu **Cikgu Omar Baki Matusin (SMK Ranche-Ranche)** dan **Cikgu Sahar Misron (SMK Pantai)**, baru-baru ini di salah sebuah hotel di Labuan.

Cikgu Omar Baki memulakan kerjaya sebagai seorang pendidik bermula dengan menjadi guru sandaran di SMK Kuala Penyu pada tahun 1987.

Setelah menerima Diploma Pendidikan UKM, beliau telah ditugaskan di Pulau Labuan iaitu di Sekolah Berasrama Penuh Labuan pada tahun 1990 dan berkhidmat selama 5 tahun.

Beliau kemudiannya berpindah ke Sabah pada tahun 1995, di SMK Majakir, Papar dan memegang jawatan sebagai Penyelia Petang serta Penolong Kanan Hal Ehwal Murid.

Pada tahun 2000, beliau berpatah balik semula ke Pulau Labuan, dinaikkan pangkat sebagai Pengetua yang pertama, di SMK Taman Perumahan Bedaun.

Perjalanan karier beliau terus berkembang sehingga

dilantik sebagai Ketua Sektor Pengurusan Sekolah, Jabatan Pendidikan WP Labuan pada tahun 2001 sehingga 2013.

Seterusnya, pada tahun 2013, beliau sekali lagi dinaikkan pangkat dan dilantik sebagai Pengetua dan juga merupakan pengetua yang pertama, di SMK Ranche-Ranche sehinggalah beliau bersara wajib pada tahun ini di usia 60 tahun.

Cikgu Omar Baki mendapat pendidikan Ijazah Sarjana Muda Ekonomi daripada Universiti Kebangsaan Malaysia dalam bidang Ekonomi.

Anak kelahiran Menumbok Sabah ini, berkahwin dengan Puan Norismah Ab Moin (mantan Ketua Sektor Pengurusan Akademik, Jabatan Pendidikan WP Labuan) dan dikurniakan 3 orang cahaya mata.



Cikgu Omar Baki menerima Sijil Penghargaan daripada Encik Raisin Saidin



Cikgu Omar Baki dan Isteri bersama Cikgu Sawal Pengetua SMK Pantai IB World School, Cikgu Sahar Mison bersara wajib 60 tahun pada 3 Mei lalu selepas menabur bakti dalam perkhidmatan awam selama 38 tahun.

Beliau mula bertugas di Wilayah Persekutuan Labuan sejak tahun 2003 hingga 2019.

Cikgu Sahar memulakan kerjaya sebagai guru di SJKC Kemayan, Pahang pada tahun 1981 hingga 1983, kemudian berpindah tugas di SJKC Maran, Pahang tahun 1984 dan SJKC Chung Ching, Kuantan, Pahang pada tahun 1985 sehingga 1987.

Seterusnya beliau ditawarkan berkhidmat di Pusat Perkembangan Kurikulum, Kementerian Pendidikan Malaysia di Pesiaran Duta, Kuala Lumpur tahun 1987 sehingga tahun 2000.

Beliau kembali bertugas di sekolah setelah memperoleh Sijil Kelayakan Kepengetuaan Kebangsaan pada tahun 2001.

Beliau bertugas di SMK Yaacob Latiff, Jalan Peel, Kuala Lumpur pada tahun 2000 sebagai Ketua Bidang Kemanusiaan untuk tempoh lima bulan, sebelum dilantik menjadi 'caretaker' sekolah baharu di Sekolah Menengah Setapak Indah pada tahun 2001-2003.





Penghujung tahun 2003, Cikgu Sahar berhijrah ke Pulau Labuan dan menjadi guru Geografi dan Bahasa Melayu di SMK Pantai.

Setelah itu karier beliau diteruskan dengan menjawat sebagai sebagai Ketua Unit Perkhidmatan dan Ketua Sektor Perkhidmatan Pelajaran di Jabatan Pelajaran WP Labuan pada tahun 2005 sehingga tahun 2006.

Beliau menjadi pengetua SMK Lajau yang ketiga selepas Haji Mohammad Abu Bakar dan Abidin Marjan pada tahun 2006.

Bertukar ke Sekolah Sukan Negeri SMK Mutiara tahun 2011

sehingga tahun 2012, sebelum kembali bertugas menerajui SMK Lajau mulai 16 Januari 2012.

Selepas itu beliau bertugas di SMK Pantai sebagai Pengetua Cemerlang mulai 16 April 2012 sehinggalah bersara wajib pada 2 Mei 2019.

Sepanjang 16 tahun berkhidmat di Labuan, Cikgu Sahar aktif dalam pelbagai kegiatan kemasyarakatan dan badan bukan kerajaan (NGO).

Warga Jabatan Pendidikan Wilayah Persekutuan Labuan mengucapkan setinggi-tinggi penghargaan kepada jasa dan pengorbanan Cikgu Omar Baki Matusin dan Cikgu Sahar Misron dalam dunia pendidikan. Selamat Bersara dan Terima Kasih Cikgu.







Gambar kenangan Cikgu Sahar dan Cikgu Omar bersama warga Pendidikan Labuan

Lawatan Penanda Aras SK Kg Keningau ke SK Sg Bedaun, Tambah baik Pelaksanaan Program Transformasi Sekolah



Labuan – Seramai 30 orang guru Sekolah Kebangsaan Kampung Keningau (SKKK), Sabah telah mengadakan kunjungan Penanda Aras ke Sekolah Kebangsaan Sungai Bedaun (SKSB) pada 25 April lalu.

Menurut

Dg Sarifah Binti A. Mahmod, Guru Besar SKSB, lawatan penandaarasan pada kali ini adalah berfokus kepada Program Sekolah Transformasi (TS) serta berkongsi amalan terbaik dalam pelaksanaan program TS kedua-dua buah sekolah. SKSB merupakan sekolah transformasi kohort 2.0 manakala SKKK pula kohort 1.0.

Katanya,

lawatan ini adalah untuk perkongsian pintar, sebagai penanda aras dan perolehan input-input yang berguna yang boleh dijadikan panduan dan rujukan kepada kedua-dua buah sekolah.

“Guru-guru dapat mengenal pasti kekuatan sumber, anggota organisasi yang sedia ada serta menjalin silaturrahim dan bertukar-tukar idea dalam usaha meningkatkan pencapaian akademik, ko kurikulum, peningkatan sahsiah dan pengurusan yang berkaitan untuk disesuaikan dengan persekitaran dan murid yang sedia ada. Malahan melalui perkongsian idea ini, diharapkan dapat membantu kedua-dua buah sekolah mencapai kecemerlangan dan kemenjadian murid.” katanya.

Program Transformasi Sekolah 2025 (TS25) merupakan sebahagian daripada usaha Kementerian Pendidikan Malaysia ke arah meningkatkan kemenjadian murid dan sekolah berkualiti. TS25 adalah satu usaha kearah melahirkan modal insan unggul melalui persekitaran pembelajaran yang menyeronokkan, kepimpinan yang berkualiti, guru yang kompeten dan beraspirasi tinggi dan komitmen komuniti yang padu.

Ketibaan rombongan tersebut yang diketuai oleh Puan Lea @ Leah Lewas, guru besar Sk Kg Keningau telah disambut dengan paluan kompang daripada murid-murid tahun 3 hingga tahun 6. Mereka turut melihat persembahan kulintangan yang dimainkan oleh murid-murid tahun 5 dan 6 di Galeri Permata yang merupakan antara kebitaraan di SKSB. Kumpulan kulintangan dan kompang ini telah dilatih oleh ibubapa yang merupakan anggota Penggerak Ibu Bapa dan Komuniti (PIBK).



Murid-murid sedang memainkan kulintang bagi mengalu-alukan kehadiran ahli rombongan daripada SK Kg Keningau. Sesi lawatan di SKSB turut meninjau Bilik Gerakan Persatuan Ibu bapa dan Guru (PIBG), 3 buah kelas Pra sekolah iaitu Kelas Pra Baiduri, Pra Delima dan Pra Mutiara, Galeri Permata dan Taman Herba yang merupakan projek kolaboratif di antara Panitia Bahasa Inggeris dan PIBK di bawah Program Imersif Tinggi (HIP). HIP diperkenalkan untuk meningkatkan penguasaan bahasa inggeris dalam kalangan murid-murid melalui program atau aktiviti di dalam dan di luar kelas.

Turut menjadi tarikan di SKSB ialah Sudut STEM iaitu Program Sains, Matematik, Kejuruteraan dan Teknologi (STEM). Pelbagai hasil kerja murid dan info berkaitan STEM dipamerkan. SKSB telah dipilih untuk menjadi sekolah rintis Pendidikan STEM peringkat Wilayah Persekutuan Labuan. Pendidikan STEM merupakan konsep berpandukan komponen 4C atau 4K iaitu komunikasi, kerjasama, kreativiti dan pemikiran kritikal seperti yang terkandung di dalam pembelajaran abad ke-21 (PAK-21) serta kemahiran berfikir aras tinggi (KBAT).



Rombongan SKKK melawat Taman Herba yang dibangunkan oleh murid-murid dengan bimbingan guru.



Ahli rombongan mengabdikan gambar kenangan di anjung Galeri Permata.

Dalam sesi lawatan tersebut, turut disampaikan taklimat mengenai Perkongsian Pelaksanaan Program Transformasi Sekolah (TS) dan kejayaan sekolah sepanjang tahun 2018 hingga April 2019. Taklimat tersebut disampaikan oleh Pn Rina @ Farrina Binti Dakim @ Jalaludin, Penolong Kanan Pentadbiran.

Majlis menandatangani memorandum Persefahaman Kolaboratif Startegik di antara kedua-dua SKSB dan SK Kg Keningau turut diadakan di akhir sesi lawatan. Semoga dengan adanya jalinan ini kedua-dua pihak akan saling berkongsi ilmu dan bertukar pandangan ke arah pemantapan Pengurusan Sekolah dan Pelaksanaan Program TS25 di tempat masing-masing.

Rombongan ini turut disertai oleh Puan Zaleha Binti Salleh, Penolong Pengarah Sektor Pengurusan Sekolah selaku pegawai yang bertanggung-jawab membimbing Penggerak Ibu bapa dan Komuniti (PIBK) di Jabatan Pendidikan Wilayah Persekutuan Labuan (JPWPL) dan Encik Roziman Bin Sabtu, Penolong Pengarah Pusat Kurikulum.

Semoga Lawatan Penanda Aras ini mampu memberi lonjakan inspirasi untuk kecemerlangan kedua-dua pihak.

Berita Oleh : SK Sungai Bedaun



Dg. Sarifah (duduk dari kiri), Lea @ Leah Lewas (duduk dari kanan) menandatangani memorandum Persefahaman Kolaboratif Startegik sambil disaksikan Zaliha Salleh (berdiri-tengah), Roziman (berdiri dua dari kiri) dan barisan penolong kanan SK Kg Keningau.



Dg. Sarifah (duduk empat dari kanan, Lea @ Leah Lewas (duduk empat dari kiri) Zaliha Salleh (duduk tiga dari kanan) Rina Farrina (duduk dua dari kanan), Roziman Sabtu (duduk dari kanan) mengabdikan gambar kenangan bersama ahli rombongan SK Kg Keningau, Sabah.

**KPPM : Inovasi Bantu
Memudahkan Pembelajaran
Murid**



Labuan, 27 Apr – " Inovasi adalah salah satu cara pendekatan yang dapat membantu memudahkan pembelajaran dan perkembangan murid ", demikian ucapan Ketua Pengarah Pelajaran Malaysia, Datuk Dr. Amin bin Senin semasa merasmikan Karnival 'Mai Tah Bainovasi' WP Labuan Peringkat Kebangsaan 2019 yang berlangsung di ruang legar Ujana Kewangan, Labuan hari ini.

Beliau berkata, guru harus menggunakan cara dan pendekatan berbeza termasuk mencipta inovasi dalam mentransformasikan pendidikan dengan menitikberatkan pembelajaran berorientasikan perkembangan murid, bukan setakat menghabiskan sukatan mata pelajaran semata-mata.

Pendekatan sistem pendidikan sekarang agak berbeza berbanding sebelumnya kerana Kementerian Pendidikan Malaysia (KPM) turut menekankan aspek pembinaan watak dan sahsiah murid.

Justeru katanya, guru perlu beralih daripada memfokuskan kecemerlangan keputusan peperiksaan kepada pembelajaran berasaskan perkembangan murid.

Pada tahun ini penyertaan dalam Pertandingan Inovasi Guru (TIC) meningkat, iaitu 115 inovasi berbanding penyertaan 73 inovasi pada tahun 2018.

Pertandingan Inovasi Guru melibatkan peserta dari negeri Sabah, Sarawak, Perak, Selangor, Terengganu, Johor, WP Kuala Lumpur dan WP Labuan sendiri, di mana inovator terdiri daripada guru-guru dan pensyarah-pensyarah IPG, Matrikulasi mahupun Universiti.



Peserta dari Sarawak sedang memberi penerangan ciptaan inovasi mereka kepada Datuk Dr. Amin Senin Sementara itu, Pengarah Jabatan Pendidikan Wilayah Persekutuan Labuan Encik Raisin Saidin dalam ucapan aluan berkata karnival ini mampu menjadi medan percambahan ilmu, membina karakter pendidik untuk sentiasa hidup mendidik dengan seronok melalui inovasi dan kreativiti.

Encik Raisin Saidin juga sentiasa mengingatkan semua guru agar memastikan roh guru sentiasa mendarah daging dalam setiap diri guru, yang matlamat akhirnya ialah

kemenjadian anak-anak murid Labuan.

Karnival Mai Tah Bainovasi @ Labuan ini mengandungi tiga aktiviti utama iaitu Jom KICK (Kongsi Inovasi, Cerita Kreativiti), Pertandingan Inovasi Guru (TIC- Teachers Innovation Competition) dan Santai Seni BuNT (Bunyi, Nyanyi dan Tari).

Datuk Dr. Amin Senin juga berkesempatan menyampaikan hadiah kepada Ikon Guru, Guru Inovatif dan Guru Adiwira PAK21 sempena sambutan Hari Guru Tahun 2019.

Cikgu Rahman bin Jaafar dari SK Pekan Dua telah dinobatkan sebagai Ikon Guru Sukan, Cikgu Jasmini binti Daud , guru SMK Ranche-Ranche dipilih sebagai Ikon Guru Seni, Manakala Ustaz Abdul Kahar, guru SK Pantai memenangi kategori Ikon Guru Kokurikulum.

Anugerah Kategori Guru Inovatif pula dianugerahkan kepada guru SK Pekan Dua, Cikgu Jesste Valentine Stidi (Kategori Sekolah Rendah), Cikgu Mohd Azlan bin Mohd Rani, guru SMK Labuan (Kategori sekolah Menengah) dan kategori kumpulan telah dimenangi oleh SMK Taman Perumahan Bedaun yang terdiri dari Cikgu Juraidah Aman, Cikgu Ahmad Fitry Ismail dan Cikgu Gabriel Chin Vui Wen.



Anugerah Guru Inovatif Berkumpulan 2019 : SMK Taman Perumahan Bedaun



Datuk Dr Amin Senin menyampaikan sijil kepada salah seorang Guru Adiwira PAK21, Cikgu Yahya dari SM Sains Labuan

Pada sebelah petang berlangsung majlis penutupan dan penyampaian hadiah yang telah disempurnakan sendiri oleh Pengarah Jabatan Pendidikan WP Labuan, Encik Raisin Saidin.

Dalam ucapan penutupan, beliau mengucapkan setinggi penghargaan kepada para inovator kerana sudi berkolaboratif dengan Jabatan Pendidikan WP Labuan untuk menyemarakkan daya kreativiti seterusnya membantu mewujudkan suasana pembelajaran yang menyeronokkan dalam bilik darjah kepada murid-murid.

Encik Raisin Saidin menyarankan agar program ini dapat diperluaskan kepada murid-murid. Ini akan menggalakkan pula murid-murid menghasilkan inovasi seterusnya

mengongsikan inovasi mereka dengan murid-murid lain. Hal ini akan menjadi pemangkin kepada kemenjadian murid secara menyeluruh.

Inovasi yang telah memenangi Pingat Emas dan Anugerah Platinum ialah Project Introduction Supporting Materials (PRISM) : Transforming Students Perceptions Towards Learning Chemistry, Ketinting SuKa, Islamic Maths Game, Rotactor Gold, Celik Abjad dan Mobile Wudhu.

Karnival ini diterajui oleh Sektor Jaminan Kualiti, yang diketuai oleh Ketua Sektor, Puan Khaziyati Osman.



Encik Raisin Saidin menyampaikan piala kepada pemenang Anugerah Emas dan Platinum



Encik Raisin Saidin menyampaikan piala kepada pemenang Anugerah Emas dan Platinum



Encik Raisin Saidin dan Puan Khaziyati bersama para pemenang Anugerah Emas dan Platinum Maitah Bainovasi @ Labuan 2019



Gambar kenangan Datuk Dr Amin Senin, Encik Raisin Saidin, Encik Mohd Idris bersama Ketua-ketua Sektor Jabatan Pendidikan Wilayah Persekutuan Labuan